

Vröjer en Neesch  
van Brand Kathrinche

Wie merh son Blaare van nüng ov teejn Joor woore, du woor et en Neesch noch so rischtisch schön. Hade merh doch doo, wo hüt die Wäätallee es, en Kaschteieallee, on dat woor ose janze Schtolz. Jet wijer op dä Riin, doo wor och noch en Nootallee. Äver di Nooteböjm woore al ärsch vrschleete, on an di Kaschteieallee woor emmer völ miir loss. Et janze Joor vreude merh os al op dä Härres, wenn di Kaschteie riip woote.

Mer Blaare hade joo emmer jät te don: em Wenkter jeng et möm Schlittschtoul on de Peejke. Hengenoo hadde merh och al schlittschoon. Di woote onger son aal Schoon drongerjeschroove. Äver merh wosse et net bääter un et woor schön. Em Vrüüjoor woot e Hepscherfke jesoot, un dan woot jehept. Oder merh deje mörmele. Jeder hat ene Büll voll Mörmele oder Dötz un en Kadätsch. Em Soomer woot em Böschke vrstoppe jeschpelt, wenn schön Wääer woor. Dat hescht, wenn merh net möt nom Velt mosse un doo helpe, denn dat mosse merh döker.

Äver wenn de Kascheie riip woore, dann woore merh net miir te halde. Van den Scholl jeng et em Jalopp noo Huus, di Scholärbet jemäkt, - noo di Flokemiit on Knöpele jesout vör Kaschteie avteschmiite, un wemmer dan jraad avhaue welle, koom dat Schlemmste: et heschde, maar janz langsam: et eesch jeet et möt noom Velt un doo wäade noch e paar Reije Røjbe uutjereete. Doo holp ke Bäddele noch Aanhalde. Bös Omma, di möt sine blaujeschtribde Schamoueschooz henger dä Hääd soot, seit: "Nou lot se doch loope!"

Dan woore merh äver och al weg. Un wemmer doo aankoome, woor do al Jubel em Döppe. En Bölkerej van di Blaare. Merh Weejter heele os emmer doo op, woo di jroote Böösch woore, weil dii möt de Knöpele bis an de hökste Telje koome, woo de schönste Kaschteije soote, on vör os dan emmer jät möt erav koom. Schlemm woot et äver, wenn op ens ömes schreide: "do koome die Längster Schlaatefekse!" - Em Nuu woor dä schlemste Kreesch em Jang; wenn dan och noch ömes reejp: "jez koome noch di Länkter Rabaue," woot dat janz schlemm. Di Länkter hade joo selver Kaschteie em Boosch beej Schloss Pesch, äver di aal Prinzäs, di jäschde di Blaare tem Deuvel, wen di sesch em Boosch bleke leejte.

Äver merh hant emmer jenoch mötjekreeje, di dan fein jedrüscht woote, un dan hade merh de janze Wenkter jät. Et es en Schant, dat et hüt ken Kaschteieallee mer jöv't!

---

Kaschteieallee - Kastanienallee  
 Nootallee - Nußbaumallee  
 vrschleete - verschlissen, überaltert  
 Härres - Herbst  
 Schlittschtoul - Schlitten mit Schmalkufen  
 Peejke - Spitzstöcke zum Fortbewegen  
 Schoon - Schuhe  
 Hepscherfke - Hinkelscherbe  
 Kadätsch - dicke Murmel  
 Wääer - Wetter  
 döker - öfter  
 Flokemiit - Stapel von Reisigbündeln  
 blaujeschtribde - blaugestreifte  
 Schamoueschooz - Siamoseschürze  
 Bölkerej - Kindergeschrei  
 Weejter - Mädchen  
 Telje - Zweige  
 Schlaatefexe - Salatbauern

